

NOS hendenan SPECIAL

Chu Halabi: como Profesor di Educacion Fisico

"MI TA PURBA FORMA E HOBEN BIRA UN SER HUMANO INTEGRAL"

Redacta pa: Mercedes Abdul

Den nos espacio "Nos Hendenan Special" nos tin como invitado awe Sr. Jesus (Chu) Halabi, kende ta un conocido deportista y Meneer di Educacion Fisica na Colegio Arubano. Chu Halabi tabata activo den Baseball y el a participa den weganan internacional. E ta haya cu nos muchanan mester tin mas oportunidad pa practica deporte y cu na Aruba mester di mas lider cualifica.

Chu Halabi a pasa su school basico na Nieuwindt College na Curacao, despues el a bay St. Thomas College y despues na Peter Stuyvesant.

Ora el a caba school secundario el a drenta school di Polis y a gradua na 1967. Na Mey di e mesun aña el a bini Aruba.

"Mi ta haya cu e tempo cu mi a pasa como polis na Aruba a yudami masha hopi den mi formacion, tanto como ser humano y como lider, pasobra mi a siña hopi for di tur e cosnan cu mi a mira y pasa aden. Nos tabata tin un disciplina den e Cuerpo cu a yudami a traves di añanan den deporte, y a yudami con pa traha cu hobennan y purba siñanan disciplina sin ta ser mucho rigido. E trabao di polis ta un trabao masha bunita y si bo trahale bon e ta trece hopi satisfaccion pa bo mes como ser humano".

Na aña 1973 Sr. Halabi a abandona Cuerpo Policial. E motibo e ta splica asina aki.

"Pa ser franco mi a encontra problemanan cu poco polis Hulandes, y e mesun disciplina cu mi tabata tin den cuerpo policial, mi tabata rebelde tambe. Mi tabata para pa mi derechonan y na dado momento ningun di e dos partinan por a soporta otro. Na aña 1975 mi a worde traslada pa Departamento di Cultura y Educacion e tempo ey, y mi a haya oportunidad pa mi bay sigui studia na Merca, den e ramo di Educacion Fisica".

EDUCACION FISICA

Na Merca el a bay Springfield College na Massachussets.

"Eynan mi a keda pa un periodo di 5 aña y mi a gradua cu un Master den Science cu specializacion Physiology of Exercises y Teaching Coaching Administration.

E tabata un periodo hopi duro pasobra nan a dunami oportunidad pa bay pero mi no por a hiba mi famia cu mi.

Mi tabata bini Aruba maximo dos vez pa aña. E school tabata uno exigente y hopi dificil, y no tabata facil concentra den bo lesnan tur ora, specialmente si bo tabata na altura cu cualquier miembro di bo famia tabata malo, of bo yunan tabata pasa den algun problema.

Pero a base di perseverancia y fe den Dios cu trabao duro, mi a gradua na Mey 1980, suma magna cum laude".

CONTRATEMPO NA ARUBA

"Mi mester bisa cu apesar di e diplomanan cu mi tin, mi a pasa den hopi contratiempo na Aruba. Gobierno ni schoolnan kier a dunami trabao. Mi opinion personal y mi ta keda para ariba, cu esey a sosode pa motibo politico, aunque mi no tabata un politico.

Mi a keda mantene mi mes ocupa cu yuda hubentud te caminda mi tabata por, entrenando diferente deporte na Aruba, inclusive yudando personanan menosvalido, y tambe yuda un organizacion profesional di baseball na Merca".

NA COLEGIO ARUBANO

"Tabata na aña 1985 cu a bin un vacatura na Colegio Arubano y mi a solicita y e biaha aki si mi tabata tin suerte y mi a worde tuma den servicio.

Mi por bisa cu mi ta sumamente contento di e oportunidad aki pa motibo cu mescos cu durante mi añanan den servicio policial mi a hayami ta traha cu hobennan, di tur parti di Aruba, y di tur edad. E experiencia aki a ponemi na un dado momento na ser mas cu un entrenador fisico.

Cierto momento bo ta bay ser



Sr. Chu Halabi

un amigo, un ruman, un tata di e alumnonan. Mi trabao como educador fisico, mirando e situacion na Aruba no ta solamente siña e muchanan un deporte, pero tambe yuda den nan formacion como ser humano.

Mi ta purba forma nan tanto spiritual y fisicamente. Den e Instituto cu mi a siña nos ta yama esey "Spirit Mind and Body".

Mi ta bisa asina pasobra e situacion cu nos ta traha aden na Aruba, como educador fisico, ta hopi limita.

E ta limita basa riba facilidad, material, y tambe e tempo.

Pesey mi a dicidi cu mi ta purba forma e alumnonan bira sernan humano cu por bay funciona mañan den nos sociedad y bira hendenan responsable".

Sr. Halabi ta sigui bisa cu loke e kiermen ta cu na Colegio tabata tin facilidad pero na dado momento (1990) e facilidad a worde cera y no por haci uso mas di dje.

"Pero nos sistema di educacion ta permiti e muchanan participa un bez so pa siman den les di Educacion Fisica, y ta logico cu den un bez pa siman bo ta keda limita pa siña e alumnonan tur loke bo tabata kier den e materia cu bo ta presentando. Pesey mes mi tabata y ta pone hopi enfasis, banda di e formacion di ser un bon deportista, tambe bira un bon hende, capaz compronde e problemanan di otro y tambe siña comparti tanto den oranan

alegre como den oranan menos alegre".

E SISTEMA MESTER CAMBIA

Sr. Halabi ta indica cu nan ta bayendo den un direccion hopi positivo cu e sportzaal cu Colegio ta hayando, pero esey no ta e solucion final.

"E sistema di educacion fisico na school mester cambia completo. Mester bini un curriculum pa cu Educacion Fisico, y gracias a Dios nos tin na e momentonan aki coleganan cu ta trahando riba esey.

Hunto cu esaki e materia mes di Educacion Fisico mester haya mas balor. Cu mas balor mi kiermen cu e ta yuda e alumno pasa di un klas pa otro pasobra na e momentonan aki hopi bez e alumno no ta importe pasobra si e no haya un bon punto mes, esaki no ta afecte na nada cu excepcion di e alumnonan di 4de klas y esnan di E-1.

Te hasta den e aspecto aki e no ta husto pasobra e por stroba e alumnonan ey bay over pero e no ta yuda nan si nan haya puntanan halto pa Educacion Fisico. O sea, un 5 por trece un onderpunt, pero un 8 no ta yuda e alumno na nada.

Mi mester bisa si, cu nos na Colegio Arubano ta haya tur cooperacion y apoyo tanto di nos rectorado como di Directiva di School".

NOS HOBENNAN

"Deporte ta un medio riba su mes pa nos yega na un fin, pero e no ta turcos. Nos ta existi hopi biaha pa nos yunan haci deporte, pero no tur mucha por haci deporte. Ademas di esey hopi biaha muchanan menos atletico cu kier haci deporte no ta haya apoyo cerca nan entrenadornan, pasobra na Aruba tin mucho enfasis pa gana.

E pensamiento aki ta encera un filosofia di egoismo unda cu e entrenadornan ta pensa riba triunfo envez di pensa riba oportunidad pa e hoben participa y usa su tempo liber

den un forma positivo".

Sr. Halabi kier men cu hopi biaha e muchanan menos bon no por haya chens di drenta den un team, of ta bisa nan cu no tin lugar, pasobra esnan cu tin mas habilidad tin preferencia.

"Tambe mayornan no ta hunga un rol agresivo pa cu nan yunan.

Nan ta baha nan na veld bay laga nan, nan no ta presencia training ni wega, cu excepcion di algun, y ta masha importante pa un mucha ora cu e ta participa, sa cu e tin apoyo di su mayornan, tanto ora cu haci algo bon y tambe ora cos a bay poco fout".

MESTER DI MAS LIDER

"Hubentud Arubano ta dispuesto na traha, y traha duro, pero lamentablemente no tin hopi lider cualifica y cu kier dedica nan tempo na yuda nos hubentud.

E hubentud Arubano a demostra cu si dedica tempo cune, y mustrele comprension y atencion, e lo haci lo maximo y presta loke nan realmente por".

DEN DEPORTE

Sr. Halabi a haci diferente deporte, pero e tereno unda el a sobresali mas ta den Baseball.

"Mi a participa den diferente seleccion di baseball y den diferente wega Centroamericano, Panamericano y mundial.

Na aña 1973 mi a pone dos record como receptor defensivo na Mundial na La Havana, Cuba y den e votacion pa e mehor Catcher di e mundial mi a keda na di dos lugar.

E trofeo a bay pa esun cu a sali prome anto mi a haya un certificado.

Mi a milita hopi aña den Marlboro como hungador, entrenador y Manager.

Actualmente mi ta traha cu Hubenil di Marlboro y mi ta yuda coordina hunto cu Cay Cay Williams ora e pidimi practicanan di Marlboro Doble A".